

Laolita i Wali mPangipi

(direkam oleh N. Adriani dari i Pake 1897 di daerah Poso)



This work is licensed under a
Creative Commons Attribution-NonCommercial-ShareAlike 4.0 International License.

LOBO/ York Centre for Asian Research

Maroo-roo Ta Datu pai Indo i Datu, masae-sae ngkaroo-roonya, napopea bara da moana, bare'e. Kaewance'anya, mesonomo Ta Datu. A, nato'o, mapari se'e, Indo i nDatu, bare'e re'e anata! Ya masae-sae, tianamo Indo i nDatu; Katiananya se'e: Hu-epe! nato'o, podi yaku, Ta Datu! Podi yaku! podi yaku! kangidaku se'i. Napokau wa'a mbatuanya njo'u mepodi: tombe, katimba, onco, dongingi, dongkongisi, jongi, takule, ngaya-ngaya anu podi nakeni, buke-bukemo sancuno ri ra mbanua. Na koni Indo i nDatu sangaya saogu; puramo nakoni, bangkemo komponya. Nakeni ngkasaenya jelamo ri wuyanya, ri wenginya, ri eonya, mekalemo ananya: De, de, de, de, Ta Datu, jiri pe, lupa mpa'a njai dopi, a, tuamamo! Sompimo waya mpusanya! Nasompi njimuyu, nariu-riu ue ngkatuwu saeo sambengi, saeo sambengi, mewonggamo, napasusu ntau sondo, nenenya montalikusi apu medoro, sambenginya, sangayanya kabangkenya, rantani mekolikamo, menjoyomo ri joia, metoamo, medandano ri rindi, rantani, kampondo-mpondo, lo'emo melinja, napoto'o i Wali-mPangipi. Moloncomo lau tana, be masae naincani moehe. Polegalleganya ri tana, marameda naepe, nasale nenenya njo'u ri ue, nato'o:

Da ntamalai mandiu kita se'i nene, Indo i nDatu.

Marameda ngkuepe yaku se'i, nene ge, Indo i nDatu.

Ndiako ana mayunu da nji ue, da mangangkeni puemi.

Njo'umo ana mayunu togompuyu, ja menau tudu lai tana, natima noti sa'owo ungka ri polude. Rata njai ue, mosompomo, noti nakeni mposompo nadika lai dada, meloyo, ja lo'u meloyo, nalapasaka noti be kaincani kajunya, jamo kanotinya se'i. Mesuwa lai tanta'inya, nakeni nu ue noti; mewalili ri banua, maroo-roomo. Ganamo logo mbengi, napeboo ginampinya, ana i

nCumboli: i Sungko nTada, i Tada Sungko, i Tabo Lempe, i Lempe Tabo, i Bengo Watu, i Watu Bengo, i Peto Tosu, i Tosu-Peto, nato'o:

Imbe'imo i Sungko nTada. Tada Sungko, timakaku ngkaiku lai loka. Ndiako sa, ndipeboo ngkaiku lai loka.

Njo'umo koju anu napokau, jelamo lai loka, kare'e nu langkai tu'a; meoasi langkai luo nato'o:

Maka komi setu anaku, nu nja nditunggai?

Mesono anu napokau:

Kami se'i, ngkaiku, napokau nu mokole ma'i mompeboo komi. Da mandake ri banua, bara nja da nato'o, ngkaiku.

Mesono langkai tu'a:

Ndiako tamalaimo se'i, makumpuku Sungko nTada.

Njo'umo, jelamo ri banua, mempone ndekumo, motunda ri wombo, mowotu i Wali mPangipi, nato'oka langkai tu'a:

Ndipeencu wai ma'i, komi se'i ngkaiku lai loka.

Ndipamongoka ngkaiku o neneku, Indo i nDatu.

Napamongoka, roo mamongo, meoasi langkai tu'a:

Nu nja kanca anaku, nupekitima yaku, makumpuku.

Bare'e bara nunja kupekitimaka komi ngkaiku.

Ikomi da kupokau da lo'u da nu nipanjalaka yaku raneo ri tasi.

Ane ja setu anaku nuto'o, ne'e masusa rayamu.

Jamo nakabangke ndeme, raneo anaku i mPangipi.

Metompa mpalakanamo yaku se'i, makumpuku i mPangipi.

Malaimo kojo, jelamo ri banua, natowo loka sambuli ngkinowia, sambuli mawuro, bara sangara, bara banya sambulimo yau. Bangke reme sambuli nakoni, mamongo, natima jala, karanji, malai; tudu lai tasi, mojala; re'emo bau yau nale'o, bepa gana sumpuyu mba'a. Sampali naolesaka, sima'imo duanga ja kangkanyo-ngkanyo tau ri rayanya, re'e tesantamungku, ntano be njau tau, nakita duanga noti i Wali mPangipi mewali duanga ewa buke tau, ntano bare'e. Jingkimo raya langkai tu'a, naluntasaka jalanya, moloncomo napokaeka duanga, jamo liuliu ndeki lipu napewunuka jalanya ndati kandepunya, mepone ndati lipu, ngasamo sawi, wainjo'u wai ndeku inosanya, motunda ri wombo, napetumbuka Ta Datu pai Indo i nDatu:

Se'ipa pai da mate kita se'i, makumpu i Ta Datu.

Se'i pai sondo silau ri duanga makumpuku.

Se'i laupa ngkukita, kabangkenya nu duanga ewa ogu ntando mbuyu.

Mesono i Ta Datu:

Bara ja bare'e monco bara ja ndilego-lego ngkaiku.

Mesono Langkai tu'a:

Bare'e yaku mawuti, banya kalopu-lopu makumpuku.

Lau kojo nu duanga ri wiwinya mangampago yaku pane.

Mesonomo i Ta Datu:

Ndiako pewalili komi se'i ngkaiku lai loka.

Mesono langkai tu'a:

Motompa mpalakanamo yaku se'i makumpuku Indo i Datu, Tadata.

Mewalilimo, nakoni loka sambuli wo'u ngkinowia, maroo-roomo wo'u. Gana togombengi lo'umo wo'u tau napokau mompeboo Langkai tu'a:

I mbe'imo iSungko nTada, Tada Sungko, ndiako nditimakaku ngkaiku.

Njo'umo, narata i Langkai tu'a nji oyo loka, mewawo. Meoasi Langkai tu'a:

Maka komi setu kede, nu nja nitunggai?

Mesono tau napokau:

Kami napokau nu mokole ma'i mompeboo komi.

Mesono Langkai tu'a:

Ndiako tapalaimo kita se'i, anaku Sungko nTada.

Nakoyuyu watutu, njo'u ndeki lipu mepone ri banua i nTa Datu motunda ri wombo. Mesono i Wali mPangipi:

Ndipeencu ma'i komi se'i ngkaiku lai loka. Ndipamongoka ngkaimi se'i, neneku Indo i Datu.

Raneo lo'u donjala lai tasi komi se'i ngkaiku.

Mesono Langkai tu'a:

Ane ja nsetu, kede, jamo nakabangke ndeme raneo

Metompa mpalakanamo yaku se'i, makumpu i Pangipi.

Karemenya njo'u monjala tau tu'a nakita muni duanga bangke, napetumbuka Ta Datu,

bare'e wo'u naaya. Mewalili ri banuanya ri tongo loka, togombengi napokau muni monjala, kaewancetunya wo'u nakita duanga, napetumbuka, nepa naaya, bare'emo mesapu tau, nato'o: Moncomo se'i.

Pogombo ndipogombomo komi se'i neneku Indo i nDatu.

Nu nja, da ngkagombo kami se'i, kedeku i Wali mPangipi?

Bare'e nca kaincani da manto'o gombo se'e, anaku.

Pogombo ndipogombo komi se'i, nu pakaku i nTa Datu.

Mogombomo tau, masae-sae bara ruambengi, bare'epa nato'o pu'u mpogombonya, ja mopeasi pau, nepa nato'o:

Pedonge ndipedongeka, yaku da manto'o gombo, Papaku!

Da mombaju komi se'i, o nene Indo i nDatu, da mangabangani karu.

Ndibangani sondo, tepitumpuyu ogu, neneku Indo i nDatu.

Se'i yaku da ngkumalai mosumomba, modaga, Papaku!

Mombaju tau, jamo karutu-rutu, saeo sambengi, saeo sambengi, pitumpuyu karu nabangani. Roomo setu, mekigombo wo'u i Wali mPangipi.

Pogombo ndipogombomo, komi se'i nu papaku i nTa Datu.

Nu nja nca da ndagombo, da ndato'o anaku i mPangipi?

Da mogombomo nu yunuku, komi se'i papaku i nTa Datu.

Tundeku sampole lipu tau anu da nu keni anaku i mPangipi.

Bare'e nca ngkupokono da mangkeni tau sampole lipu.

Ne'emo yaku mongkeni tau anu bangkemo, e Papaku.

Bare'e nca da naaya yaku se'i, da manto'oka songka.

Meoasi papanya:

Mbe'i ntano da nu keni kanca tau, anu da yunumu?

Ndipeboo pura-pura wa'anya, anu moana setu njo'u,

Puramo singkandomu we'a a anu nepa poananya, napeoasi ri tesamba'a-mbaa:

Siko sangkuja mbengi poanamu tu'aku?

Yaku depa sambengi poanaku, katudunya ri joia makumpuku.

Incet u se'e samba'a anamu, da ngkupoyunu setu yaku.

Siko sangkuja mbengi poanamu tu'aku?

Yaku depa ruambengi poanaku, katudunya lai joia, makumpuku.

Incet u se'e samba'a anamu, da ngkupoyunu setu yaku.

Ewasetu ja pompeoasinya lai wa'a ntau moana, re'e anu depa togombengi, patambengi, limambengi poananya; ganamo patampuyu ana ngkodi nasingkandomu napoyunu, anu tu'a pitumbengi ja katuwunya. Nato'o: ane tau tu'a kusale, be naaya patujuku, aginya ana ngkodi ja patampuyu.

Naipua mekatudu yaku se'i, o neneku Indo i Datu.

Ndiako nditaka umbu ri duanga komi anu wa'a mpapanya patumpuyu.

Nditowo kayuku layu ndapoumbu sangkaju.

Bare'e ntano lau duanga. Ruambengipa njo'umo pura-pura, jamo anu pungku pai buta bare'e lo'u. Mekatudu lai tasi, napeboomo ngoyu, nato'o:

Pewuimo bara-bara, papute tompo utara.

Mewuimo ngoyu, patetumboli pela mata, mdimo duanga bangke. Napeboo wo'u:

Poloncomo wai ma'i duanga Lapi Tambaga ja noti ulu nasanya.

Se'imo koju duanga ma'i, mesawi i Wali mPangipi, nataka lai duanga kayuku layu, nepa nata'a wo'u kobati patampuyu, nadika lai tongonya potundanya, mopaumbu. Roo setu napokau nene nu anangkodi patampuyu:

Ndikomo ue ncusu, jai gumba bangke setu pakabuke.

Bukemo sagumba bangke, gapasi nadika ri sangkiri, nasumpuka ri nganga anangkodi, wai ma'i wai njo'u ri dulungi, ri gulingi, mopariu, mowuso'i ta'i, montatapaka kumu ewa tau potiana jamo i Wali mPangipi pai anangkodi patampuyu ri duanga. Sampuyumbengimo, ja maandu ngkalionya duanga, gana sambuya, bare'epa lawa kalo'unya, gana santa'u, ruanta'u, pitunta'u bare'epa wo'u lawa gaga, nakeni muni nu ngoyu, sologi, setu pai malente kanjo'unya. Nepa sakodi kalawanya, marapa kobati saogu, uyumbuamo setu; membangu, mesuwu ri kobati, melinja rantani maincani raa, anangkodi uyumbua setu. Ungka lai ria marapamo kobati sambengi saogu, sambengi saogu; pura marapa, nataji kobati, umbu, napobonceka anangkodi, kura napaunda anu ma'ai kabangkenya, naejani, nepa sawi tau ri wobonya mompetiro rayanya. Nepa ri ria madago pelinja nduanga; anu uyumbua napokau mogulingi, tua'inya ndati dulungi kare'anya. Mesono i Wali mPangipi:

Peboomo ngoyu bangke ri gulingi, anaku i Uyumbua.

Wa imbe'i da kuto'o da meboo ngoyu se'e Papaku i Pangipi?

Pewuimo bara-bara, papute tompo utara.

Rimbe'imo oloata, kita se'i nu papaku i Pangipi?

Tosukamo pu'u yangi njo'i mata eo setu anaku.

Ne'e mengaya ndaseko, ne'e jukusi ndato'o, anaku ri dulungi

Moloncomo koju duanga, polonconya se'i metompamo yore i Wali mPangipi ri ananya, nato'o:

Da ngkumoturu sakodi aku se'i, nu anaku patampuyu.

Sambuya da ngkukayore aku se'i, nu anaku patampuyu.

Ganamo sampuyu pai limabengi, menaa mekolika, yore wo'u, bare'emo madago polonco nduanga.

Bara nu njamo se'i nakita nduangani, e ngkakaku?

Sonomo tukakanya:

Ne'e mengaya ndato'o, ne'e jukusi ndaseko ri dulungi a'iku!

Bare'e masae nakitamo maeta sangkani yangi, ewa kambuka, maeka raya ntua'inya, nato'oka tnkakanya:

Se'ipa pai da mate kita se'i, ngkakaku Uyumbua.

Peole pesa sima'i, maeta sambira yangi, e ngkakaku.

Likemo sa, ndilike ntemaliga i papa yore tulau.

Napalikemo koju, nato'o:

Pembangu ndipembangumo komi se'i, e papaku i Wali mPangipi.

Menaamo wo'u pai nayali salimuntunya; mesono papanya:

Ne'e mengaya ndaseko ri dulungi, e anaku Kasupua.
Soka bangke ri koronya setu njau anaku Kasupua.
Peboo ngoyu bangke ri gulingi anaku Uyumbua
Pewuimo bara bara, papute tompo utara.
Polonco ntotoaka joi ria, duanga Lapi Tambaga.

Moloncomo duanga, barere masae soremo ri wawo mpasigi ase.

Ndipena'umo ndiruru sinangge setu lo'u, ne'e ntani sondo gaga.

Jamo sinangge pai panaguntu pasigi setu, nato'o: Tima samba'a samata sinangge, samba'a sampua panaguntu, mepone maliga, payamo pasigi.

Poapumo ntemaliga, komi se'i nu anaku pura-pura.
Maoromo nu kompoku, yaku se'i, anaku pura-pura.

Moapu, manana, moiru, mangkoni, mamongo, roo setu, napeboo wo'u ngoyu:

Pewuimo bara-bara, papute tompo utara.
Polonco ntotoakarao pu'u yangi, duanga Lapi Tambaga.

Moloncomo wo'u duanga, polonconya se'i, metompa yore ri ananya i Wali mPangipi:

Dangkumoturu sakodi, yaku se'i, nu anaku pura-pura.
Ruambuya ngkukayore, se'i nu anaku pura-pura.

Moturumo pre wo'u; ganamo sambuya tekiwoi, mekolika. Jamo sampuyumbengi ganamo da ruambuya nakitamo pasigi

tambaga, nasindi yangi ri wawo ntasi, mekakaimo wo'u tua'i

Se'ipa pai, da mate kita, nu ngkakaku Uyumbua.
Pelikemo sa ndilike ntemaliga, i papa yore tula.
Pembangu ndipembangumo komi se'i, e papaku i Wali mPangipi.

Membangumo kojo, pembangunya se'i, nato'o:

Ne'e mengaya ndaseko ri dulungi, anaku i Kasupua
Soka bangke ri koronya setu njau, anaku i Kasupua.
Peboo ngoyu bangke ri gulingi anaku Uyumbua
Pewuimo bara bara, papute tompo utara.
Polonco ntotoaka joi ria, duanga Lapi Tambaga.

Moloncomo duanga, bare'e masae, soremo ri wawo mpasigi tambaga, pura-puramo doi setu.

Pena'u-na'umo mangangkaku doi setu tula
Nau ja wungka sangkaku, ne'e ntani sondo gaga, anaku.
Desa-winaka mariangi tambaga lo'u nteaopo, e anaku pura-pura.

Naulayamo, roo setu, napokau: Pesawi maliga-liga, roo mesawi, napokau moapu:

Poapu ntemaliga komi se'i, nu anaku pura-pura.
Maoromo nu kompoku yaku se'i, anaku pura-pura.
Pewuimo bara bara, papute tompo utara.
Polonco totoakamo pu'u yangi, duanga Lapi Tambaga.
Dangkumoturu sakodi yaku se'i, nu anaku pura-pura.

Togombuya ngkukayore, se'i nu anaku pura-pura.

Gananya sampuyu pai limambengi, da menaamo, nakita tasi makunimo mekilaya, sore njai ria duanga ri pasigi gala, mongayangaya parewa gala lai ria: dula, sere, salapa. Napokau wo'u da mena'u montima tesaogu sangaya tau samba'a, roo naulaya, mesawi maliga-liga, payamo pasigi gala, molonco muni duanga. Moapu tau, roo mangkoni mamongo i Wali mPangipi, metompa da yore patambuyamo janjinya.

Ruampuyumbengi nepa pontu mpenaanya, nakita mabuyamo wawo ntasi, mabuyamo yangi sambira nasindi. Bare'e masae soremo ri pasigi mayo duanganya, pelurumo pura-pura setu. Menaamo, nalike nu ananya i Wali mPangipi, nawai mena'u, montima telimangkaku samba'a, roo naulaya, mesawi maliga-liga, payamo pasigi wayo, molonco muni duanga. Moapu tau, mangkoni i Wali mPangipi, roo mangkoni mamongo metompa da yore, limambaya janjinya.

Ruampuyu pae limambengipa nepa da penaanya, nakitamo ananya, mabuya tasi sambira, yangi sambira nasindi. Bare'e masae soremo ri pasigi ringgi duanganya, meuaamo nalike nu ananya i Wali mPangipi, nawai da mena'u montima ringgi samba'a, tealima, mempone muni, payamo pasigi ringgi setu. Molonco muni duanga, mangkoni, yore wo'u i Wali mPangipi, onombuya da kayorenya najanji se'e. Ganamo lima mbuya kayorenya, sambuyapa nepa da penaanya, nakita tasi mekilaya, nasindi yangi sambira mekilaya. Masae-sae sakodi sore ri pasigi inta duanganya, nepa se'e penaa i Wali mPangipi, nalike nu ananya. Mena'u pura-pura natimamo inta setu, gori ngkakononya nakaku. Mempone muni, paya pasigi inta, moloncomo wo'u duanga. Roo mangkoni yoremo wo'u i Wali mPangipi, pitumbuya najanji.

Onombuyamo kayorenya sambuya nepa da penaanya, nakita wawo ntasi makunimo sangkani, mareka wo'u yangi sambira nasindi. Maekamo raya ntua'inya, nato'oka tukakanya:

Se'ipa da maropu, da opi kita se'i ngkakaku i Uyumbua.

Ne'e mengaya ndaseko ri dulungi, o anaku Kasupua.

Dangga pelo, eka nganga, be da koje ntesakodi siko setu yau ntua'iku.

Likemo sa ndilikemo ntemaliga, i papa yore tulo'u.

Ane bare'e ndilike da ngkumenawusakamo loi tasi

Pembangumo ntemaliga, komi se'i mpapaku i mPangipi.

Menaamo nalike nu ananya, pembangunya set, nato:

Ne'e mengaya ndaseko ri dulungi o anaku i Kasupua.

Polonco totoakamo pu'u yangi, duanga Lapi Tambaga.

Polonconya se'i, soremo duanga, kasorenya napokau i Wali mPangipi:

Ndipena'umo anaku, taunaka pura-pura rengko nduanga.

Da ndiome lai tasi pura-pura parewa nduanga tunjo'u.

Naome, naoremo ntasi muni, najempi ntasi, mewalimo wayawa pura-pura, sako duanga mewali wuyawa, jamo kaju ndapoawa nakita kakajunya, sininya ri raya nduanga mewali wuyawa pura-pura, maka ri pasigi mbuyawa kasorenya.

Wusumo ta'i i Wali mPangipi mekogamaka, meotosaka ta'inya, mowotu anu napeoko motota'i ri pasigi: Mawuti wombo ntanta'i, da mantota'isi yaku sindate. Jingkimo raya i Wali mPangipi, napeoasi:

Nu nja mowotu silau? Meoko naotosaka wo'u togongkani, ntanoka wo'o mPayowi, nepa mompau-mpau mpodago, mepurunaka ta'inya ri ra ngkomponya, meoasi i Payowi: Nu nja, kede, nutunggai ? A, ja ungka ire'i ungkaku. Mesono i Payowi: Ane ewa nce'e, ne'e ndaulaya ngaya-ngaya ri pasigi, anu ruogu ire'i ri wo'oku, yali, keni njo'u, ane jela ri duanga, sungke joia ri pontu ngkayoremu, sangadi gana togombengi depa peole.

Nakenimo kojo mesawi tau pura-pura, paya pasigi wuyuwa njo'u. Moloncomo duanga; anu natima ri wo'o mPayowi nadika lai pontu ngkoyorenya, naka'uwi, gana togombengi nasungke, bukemo ungka ri gulingi rata dulungi ana nu inta ruogu se'i.

Ungka lai ria da mewalilimo duanga, napokau ntumpunya:

Pelonco mpewalilimo duanga Lapi Tambaga, ja noti ulunasanya.

Polonco ntondo wiwinya kita se'i duangaku.

Molonco duanga; yoremo wo'u i Wali mPangipi, pitumbuya kayorenya. Ganamo ruambengi kayorenya, makareba nji tana, nalo'o: Tuma'i i Wali mPangipi ungka ri modaga, nakeni nduanga wayawa sima'i. Nadonge kareba i Kapita Boneaka, mesono: A, kambamba-mbamba i Wali mPangipi! banya si'a pue nduanga, yaku yau; peoko ana mayunu, taunaka duanga mpogora-gora, kita tau biasa mogora. Satu pai lima-mpuyu ogu duanganya, panaguntu, mariangi, panta ngkainya nakeni Nalapasaka duanga, njo'umo. Sambuya nepa penaa i Wali mPangipi, nakitamo ananya duanga satu pai lima-mpuyn ogu, mowotumo anu tudi, nato'oka tukakanya:

Bara nu njamo wo'u anu nakita duanga ngkakaku?

Se'ipa pai da mate kita se'i tukaka Uyumbua! Peole pesa sima'i, napetondamo ntimali.

Ungka lai ria Menaamo i Wali mPangipi; pembangunya nato'o:

Ne'e mengaya ndaseko ri dulungi, o anaku i Kasupua.

Soka bangke ri koronya setu njau, anaka Kasupua.

Polonco ntotoaka joi ria, duanga Lapi Tambaga.

Ja siu siu molonco, sinaliu sape nalimbu duanga kora-kora mpogora, satu pai lima-mpuyu, mosumo, mowotu i Kapita Boneaka:

Ponyombamo ntemaliga-liga, anaku i mPangipi.

Mesono i Wali mPangipi:

Kapali kaea mata da manyomba nu makoje ngkatuwunya, nu tuama.

Napeboomo ido'u ananya:

Ma'imo lai soriku, anaku Kasupuaku kupaluaka baraka.

Peoko ndati dulungi, pekutana riu sala, anaku Kasupua.

Njo'umo ananya ri dulungi, mekakore lai ria meoasi:

Nu nja nca sala mami, kami se'i, nu pagora nu iwali?

Mesono pagora:

To'o ngkabongo langkai mombegora, momberatamo ri jaya.

Mesono ivo'u i Wali mPangipi:

Pakadago togongkani mangampekutana sala, anaku!

Togo ngkanimo se'i, jamo setu pobalinya; nalapasaka panaguntu nu pagora, mojlili anangkodi mekakai maju'a lai tasi, ewa boti, ba nja,¹

Ma'imo lai soriku siko setu, nu anaku Uyumbua.
Yalimo nu parewamu, purukamu, nu bajumu, nu sigamu, nu kumumu.
Sikomo sampobalinya i Kapita Boneaka setu njau, e anaku.

Napesua pura-pura, napedasaka siga, njo'u wo'u mempone ri kataba ri wawo nduanga, i Kapita Boneaka mempone wo'u ri wawo ngkatabanya.

I sema da mewunu da riunya, anaku i mPangipi?
Komimo yaumo riunya, anu metunggai setu da mewunu.
Jaga-jaga ntunjo'umo nu woto ngkayuku tumba nu yu'aku, e anaku.
Tandapaka, runcupaka lai bambaraku, setu nu pangkita e pagora.

Megancinaka, naruncupaka tawala, nasubitaka pinca, tudu ndeki wana nTo Napu.

Jaga-jaga tunjo'umo yu'a ngo'a ketagara e pagora.
Tandapaka, runcupaka lai bambaraku, setu nu pangkita pewalinya.

Megancinaka, riko nawunu. Natoposaka, mawawu ri dulungi i Wali mPangipi, bare'e napoli mantengku tawalanya. Ja telapa tawala, nenaimo mombetoto; malenge ri kataba ri raoa, malengi ri raoa, ri katabamo, sangkani katudu, ruangkani meore, mawela i Uyumbna, mowotu ananya i Kasupua:

Marugimo anami silau, nu papaku i mPangipi.

Ntanoka mate i Uyumbua, membangu i Wali mPangipi:

Deokotaka ri ma'i kupangkita nu welanya, e anaku.

Napoaju ntua'inya salumbu anu Kasupua, mempone muni:

Banyapa ewa nsetu nu lenjenya weli anu da ndaepe, e anaku.

Naowo jamo sakodi mongkekeni ewa ira laumbe. Nawangu, naunjupi, nau laranya bare'emo, tuwumo muni.

Yalikaku parewa gana-gana, anaku Kasupua.
Yakumo sampotadanya i Kapita Boneaka setu njau.

Napasua pura-pura, mesuwu ri wawo ngkataba, mombetoto, malengi ri kataba ri raoa, malengi ri raoa ri katabamo. Masae-sae naowo i Kapita Boneaka tudu i Wali mPangipi, napeboo yununya:

Ponyomba ndiponyombamo ntemaliga-liga, komi setu i mPangipi.
Bare'e nca da monyomba kami se'i, ua koje borosapu.
Ndibangani panaguntu, tarakolo panta setu, e anaku.

Nabanganimo koju, mebusi:

Lio lio wo'o ngguli, nu gandara, nu gajonya pantidoa.

Roo napanaguntu setu parewa nduanga, napeboo ngoyu:

¹ bara nunja.

Pewuimo bara-bara, papute tompo utara.
Polonco ntotoakamo pu'u yangi, duanga Lapi Tambaga.
Gajo-Gajo, remba-remba wai ma'i, nu pagora makoje borosapu.

Pai nu nja napogajo? Sako pantidoo bare'emo, gulinya jamo metaka ri sangkila, pancara'unya. Nepa naponcongka duanga:

Polonco mpewalili se'i, nu duanga mpagora Polonco mpeewa-ewa, ri iwali duanga Lapi Tambaga.

Moloncomo kojo duanga i Wali mPangipi mangarumpa duanga mpagora pura-pura, malesa, mate tau pura-pura. Puramo setu, napeboo ngoyu, napokau duanga:

Polonco njoji wiwinya, nakarata ri lipu i ntobalu i Kapita Boneaka.

Moloncomo duanga, mosompo lai sompoa i ngKapita Boneaka.

Da ntamandake sangkani kita se'i, nu anaku pura-pura.

Mosompomo ri tana, napokaumo duanga ri koro ntasi lawa-lawa. Mandrake ri lipu meoasi i Wali mPangipi:

I mbe'imo pontu ngkare'enya kanjau banua nu mokole?

Nato'okamo ntau:

Setu ndate ri tongonya, nononya saogu-ogu rindi nu pembayo.

Liu-liu memponemo ndati ria, motunda.

Pamongoka kami se'i taliwanua sinjau Pamongoka kami se'i taliwanua, sindeku i ntobalu i Kapita Boneaka

Bare'e napojo da mesua i ntobalu, maja'amo raya i Wali mPangipi, napokau ananya, nato'o:

Peokomo, taka ase, nu auaku patampuyu pura-pura.
Da ntapowiamo ja'a ri lipunya, i ntobalu i Kapita Boneaka.

Meokomo ana patampuyu, rneoko i tobalu, bepa naincani kabalunya. Mesuwu ri wobo mpaturua, meole i Wali mPangipi, sinaliu metaka rayanya si Wali mPangipi, mombepetaka rayanya, meunde i Wali mPangipi:

Motade nca, morupa nca, meawa nca mosipa nca, wia mbiti i ntobalu.

Molundamo i ntobalu.

Madago nca, meawa madolidi potundanya i ntobalu.

Nasila mamongo, natonju, napekitonju nu ana mayunu. Roo mamongo, napeoasi ue, nato'o:

Mbe'i pontu ngkare'enya kanjaunya ue mpandiumu se'i?

Setu tondo mata eo kanjaunya wobo njaya ue nu mokole.

Peoko, ngkou kayuku maliga, siko se'i tobalu. Da nta malai mandiu, da mendaki kita sei, ntobalu.

Roi nakou, mena'u lo'u i Wali mPangipi melulu i nTobalu, naunde:

Meawa nca, madago nca, masipa nca mombetonda njo'u ri jaya kami se'i.

Malaimo, jela lai ue, mendakimo, mompakaroso tau ri lipu sancowu pai limatu, rayanya da mompepate i Wali mPangipi,

*maka rongo nu mokole nata'unaka Toonya
menliya, dakedmo tau sondo:*

Setu tau sondo sondo, pekutana nu jayanya, e
anaku i mBua.
Bara da liu rimbe'i pekutana mpakanoto, e
anaku Uyumbua.

Meoasi i Uyumbua:

Maka komi sondo-sondo, rimbe'i da kaliumi,
taliwanua sima'i?

Mesono tau sondo:

Ne'emo ndapekutana, to'o ngkabongo tuama
anu maea matanya.
Peokomo, ntaka ase, komi se'i nu anaku pura-
pura.
Kogamaka, jujulaka, toposaka ndeku,
tumbalaka ndeki jaya.
Ne'emo boi ndisayu, da puramo taunya i
nTobalu.

*Nalapasakamo mombeilawu anu nasube
ri langkedanya, nasube, puumo wo'u
natoposaka, natumbalaka, napelele
natimboyu, madungka pura-pura naboembi.
Anu jaya ndalulu, jamo totoworo ndati lipu,
anu jingki raya molonco ndati yopo, saeo
bare'e jela mpewalili anu ma'ai kaja'a
ndayanya, ruambengi nepa jela. Mewalili tau
samboko ri banua, mamongo.*

Paundamo kura setu ntemaliga, nTobalu i
Kapita Boneaka.
Maoromo nu kompoku yaku se'i, da dadusi
nu moapu i nTobalu.
Pasambakamo anuta sadulamo, kita i
nTobalu.

Naoko pangkoni, nadika sadula-dula.

Da ntamotubamo kita mangkoni, e nTobalu.

Mangkoni, mamongomo, roo setu nato'o:

Pesuamo ntale ali siko seli, nu rongoku
nTobalu.

*Natalemo ali nadika kasoro bangke,
mesua moturu, metompa ri ananya:*

Ne'e makodi-kodi raya komi se'i anaku pura-
pura.
Yaku mesua moturu ri rayanya, anaku pura-
pura.

Mesuamo kojo, nato'o: Siko ri wawonya
Tobalu, yaku ri aranya.

Bare'e, da ngkumasala, da ngkumekutana
yaku nu mokole.
Bara, ja ndidonge-donge bambarinya
karebanya i Kapita Boneaka.
Pedongeka kupanto'o da nakanoto ndaya,
rongoku i nTobulu.
I Kapita Boneaka lo'umo ole ri daga jo rampe
nteasamba'a.

*Moturu yoremo, gana togombengi,
karabanya napisi bare'e, gana setu nato'o:*

Metompa mpalakanamo kami se'i, nu
rongoku i nTobalu.
Ne'epa wo'u magagadi, komi se'i nu mokole.
Ole bare'epa re'e nu bakumi, ndipatoka
ndipasongka.
Ta'amaka sambengi, ndipopea nepa wo'u
mondadu, e mokole.
Mbe'imo ana mayunu setu lo'u njo'u
dampalele tau.
Da mombaju sondo-sondo, da moapu pura
tau tu'a.
Da mowia anu momi gana-gana, nu susuri, nu
gurenta, waje.
Raneo da lo'u ri tasi sira nu mongkeni nu
mokole kita lai tasi.

*Mototoro'o manu, memaamo i nTobalu
mompalike yununya, membangu.*

Pembangu ndipembangumo komi, ana pura-pura da moapu.

Da mangkeni nu mokole lo'u i tasi kita se'i raneo e anaku,

Membangu, moapu, manana, mosompo manu, tudu wo'u lai tana tau. Malaimo tudu lai tasi, jamo anu buta pai pungku be lo'u; mesono i W' ali-mPangipi, nato'okamo ananya:

Peoko ntotosi kaju se'i komi anaku patampuyu.

Depowia nu balampa, ndapotunda ntetemi i Tobalu.

Napowi'a nu ananya; roo, nato'o i nTobalu:

Da rayaku damangkita nu duanga nu mokole ntobambari wuyawa.

Napokaumo i Wali mPangipi ananya i Uyumbua, nato'oka si'a:

Peboomo ngoyu bangke anaku Uyumbua.

Meboo i Uyumbua, nato'oka ngoyu:

Pewuimo bara-bara, papute tompo utara.

Polonco ma'i wiwinya siko se'i, duanga Lapi Tambaga, ja noti ulu nasanya.

Sambali nahila. rata hojo lai wiwinya:

Mokole yau mpodago yau ntano, komi se'i i mPangipi!

Poiru ntamangkonimo kita se'i, i nTobalu i Kapita Boneaka.

Moiru mangkoni.

Da ntamotuba mangkoni kita se'i, nu rongoku i nTobalu.

Bara jamo se'i se'e dombekita-kita se'e, nTobalu.

Ne'e mengaya ndato'o komi se'e, nu mokole i mPangipi.

Jamo kakuasa mPue mangandika nu rongoku i mPangipi.

Potunda ntamamongomo kita se'i, nu rongoku i nTobalu,

Metompa mpalakanamo kami se'i rongoku i nTobalu.

Ne'emo mengaya ndito'o, komi se'e nu mokole i mPangipi.

Ja mampakatowe raya ja mandika mawo ndaya, ja mandika ju'a ndaya.

Pesawi ndipesawi ri duanga, komi se'i nu anaku pura-pura.

Mesawi ananya pura-pura, mesawi wo'u si'a; pura setu, nato'o:

Peboomo ngoyu bangke ri gulingi nu anaku Uyumbua.

Pewuimo bara-bara, papute tompo utara.

Mewui ngoyu, patekolika pela mata.

Polonco mpakaliga siko se'e, duanga Lapi Tambaga.

Paunda mpompaneana komi se'i, anaku pura-pura.

Moapu, manana, nairu manghoni tau, mamongo, roo setu:

Da ngkumoturu sakodi yaku se'i, nu anaku pura-pura.

Pitumbuya ngkukayore, nu anaku pura-pura.

Ja nato'o ewa ncee se'e, yoremo kojo jamo gana limambuya, nadongemo i Kapita Malela, tuma'i i Wali mPangipi duanganya wuyawa, be nakoto i ngKapita Boneoka. Nato'oka yununya: A, peole naini, bara si'a ja tumpunya, bara bare'e makoje yaku montima duanganya, yaku da tumpunya naini.

Poiwo mpompakorokaku komi se'i nciri anaku pura-pura,

Ndiakomo ri tasi, raneo ta'unaka duanga tulau.

Lo'umo kojo duanga ruatu, nataunaka, pura molanto ri tasi, nato'o:

Poiwo pompakoroka komi se'i, nciri nganaku pura-pura.
Raneo da metudumo lo'u ri tasi kita se'i, nciri ngana.

Ja rata ri panto'onya, mesawi ri duanga nawuka bale, naore somba, nata'a guli, nayali wose.

Gajo-gajo remba-remba ri dulungi, nciri aganaku pura-pura.

Mogajomo ri dulungi anangkodi mawengi, mureme be owe jamo sambuya, nepa da menaa i Wali mPangipi.

Bara nu njamo wo'u nakita nduanga, ngkakaku Uyumbua.
Ne'e mengaya ndato'o, ne'e jukusi ndaseko tau ri dulungi e a'iku.
Jamo kakuasa mPue kita se'i nu anaku pura-pura.
Pewuimo bara bara, papute tompo utara.
Poloncomo totoakamo njoi ria, duanga Lapi Tambaga.

Bo, moloncomo duanga, jamo momberata.

Ponyombamo ntimali komi setu anaku i mPangipi.
Kapali kaea mata, da nyomba nu tuama makojo.

Nalapasaka monaguntu, manawu i Kasupua, mopiliko ewa boti ri ra ntasi.

Pekutana ndiu sala i dulungi, nu anaku Kasupua.
Nu nja nca sala mami, komi setu nu pagora makoje.

To'o ngkabongo tuama momberata ri jaya.
Poiwo mpompakoroka siko se'i anaku pantondanya.

Siko dampombalika i ngKapita Malela setu njau.

Pesuamo salanamu bajumu, nu kumumu, nu sigamu pompo'umu.

Takamo nu penaimu, timamo nu tawalamu nu kantamu, e anaku.

Peponemo ri kataba setu ndate nu anaku pantondanya.

I sema da mewunu da riunya nu pagora, nu iwali.

Jaga-jaga tunjo'umo tumba poya nu yu'aku, e anaku.

Tandapaka runcupaka ri bambaraku tulau mpangkita e pagora.

Megancinakamo, riko nawunu, nasubitaka, mekatudu bara rimbe'i ri To Bada.

Jaga jaga tunjo'umo yu'a ngo'a ngketagara, e pagora.

Lapasakamo loma'i nu pangkita pewalinya e pagora.

Megancinaka i Kapita Malela, masubitaka tudu lai dulungi duanga Lapi Tambaga, be naepe nduanga. Nalapa tawala mombetotomo, bare'emo naingki, ja malengi naepe ri kataba, ndekumo ri raoa, laumo sangkani lai wawo ngkataba matemo pagora. Mowotu yununya:

Ponyombamo ntemaliga komi setu, anaku i mPangipi.

Kapali kaea mata da nyomba nu tuama au makoje.

Banganimo panaguntu, tarakolo, panta setu, e anaku.

Lio-lio nu gulinya, nu gajonya nu pangidoa panaguntu e anaku pura-pura.

Napanaguntu parewa nduanga, ware pura-pura. Roo setu, napeboo ngoyu:

Pewuimo bara-bara papute tompo utara.
Polonco ri mata ngoyu, duanga Lapi
Tambaga ja noti ulu nasanya.
Gajo-gajo remba-remba wai ma'i nu pagora
komi setu.
Polonco mpewalili se'i nu duanga mpagora.

*Mewali duanga Lapi Tambaga
mopewalilisi pagora, napalaika roo.*

Polonco mpeewa-ewa, duanga Lapi-
Tambaga au makoje mabaraka.

*Moloncomo duanga, narumpa-rumpa
duanga mpagora, pura naposo.*

Polonco njoi wiwinya duangaku siko se'i
mabaraka makoje.

*Moloncomo jela ri sompoa i Kapita
Malela mana'umo tau, mandakemo.*

Da ntamandaka sangkani kita se'i, nu anaku
pura-pura.

*Mandakema pura-pura ndati lipu, mesua
ri boboka.*

Imbe'i pontu ngkare'enya nu balu anu mokole
i Kapita Malela.

Natujuka, nato'o:

Ndate setu ri tongonya kare'enya nu balu anu
mokole.

Mepone sawi ri banua, nato'o:

Pamongoka kami se'i taliwanua sindeku
pura-pura.
Peoko, kou kayuku ntemaliga, siko se'i
nTobalu.
Da ntamalai mandiu kita se'i, nTobalu i
Kapita Malela.

*Nakou kayuku, roo mompakoroka, malai,
mena'umo, tudu, lai tana.*

Meawa nca, motade nca, marupa nca kami
se'i mombetonda njoi jaya.

*Melinja rata njai ue, mompakoroka tau
sancowu, da mompepate i Wali mPangipi pai
ananya pura-pura. Ja bare'e masae
tongawamo.*

Setu ma'i tau sondo, ndipekutana riunya, e
a'iku!

Rimbe'i da kanjo'umi, komi setu tau sondo e
sima'i?

Ne'emo nupekutana, to'o ngkabongo tuama
nu maea matanya.

Peokomo ntaka ase, komi anaku pura-pura.

Kogamaka, rosomaka, ndiilawu, nditimboyu
ntoposaka ntumbalaka.

Ne'e boi ndipomai da mate, da puramo taunya
i nTobalu.

*Napalaska mombeilaiou, nailawu,
natimboyu, naijaki, natumbalaka roo setu
mandiu, roo mandiu jamo mandakemo nji
banua motunda mamongo.*

Paundamo kura setu, i nTo Balu i Kapita
Malela,

Moapu, manana moiru.

Da sadula-dula kita da mangkoni i nTo Balu
i Kapita Malela.

Da ntamotuba mangkoni kita se'i, i nTobalu i
Kapita Malela.

*Roo mangkoni mamongo, pura setu,
nato'o:*

Pesuamo ntale ali ntemaliga, nu rongoku i
nTobalu.

Mesuamo ndeku, yore:

Metompa mpalakanamo yaku se'i nu mPapaku i mPangipi
Ne'e makodi-kodi raya nu a'iku pantonda ja pura-pura.
Yaku, da ndeku moturu ri rayanya e a'iku, e papaku!

Ganamo togombengi porongonya, au we'a ri kasoro marate, si'a ri aranya kare'anya, sako nakangkasi bare'e, pai bare'e wo'u najama-jama.

Metompa mpalakanamo kami se'i, nu rongoku i nTobalu.
Da ngkamalaimo kami, nu rongoku i nTobalu i Kapita Malela.
Nepa riu magagadi komi se'i, nu rongoku e mokole.
Imbe'imo i Sungko nTada, Tada Sungko dampalele tau setu njo'u se'i.
Ndito'oka damombaju dontewea soudo-sondo, da mowaje pura-pura nu ngaya anu moini.

Napalelemo anangkodi: komi da mowia rote, da moonde-onde, da mowaje, mogurenta, mosanggara, mosusura, mojojori mokula-kula, mobolu, moepo-epo. Mototoro'o manu, mompelike i Tobalu, nato'o:

Pembangu ndipembangu komi se'i pura-pura, nciri ngana mayunu.
Da moapumo ami komi se'i nciri ngana ri kura loi tasi e nganaku.
Da metudu lai tasi mangangkeni nu mokole, e rongoku se'i se'e.

Bangke reme lo'umo koju jelamo ri tasi napokau ananya nu Uyumbua.

Ndipowia nu balampa dapotunda nu erami e a'iku.

Napowia balampa sarai, roo, motunda, i Tobalu samboko.

Da rayaku, da mangkita nu duanga nu mokole makareba, nato'o ntau.
Pewuimo bara-bara, papute tompo utara.
Poloncomo wai ma'i duangaku mabaraka au makoje.
Napangkita ntau sondo, napangkita ndongoku i nTobalu.

Molonco ma'i wiwinya, nato'o i nTobalu:

Mokole yau mpodago komi se'i ntano e rongoku.
Poiru ntemaliga siko se'i nu rongoku i nTobalu.
Da ntamotubamo kita, da mangkonimo, rongoku i nTobalu.
Ne'e makodi-kodi raya da ngkamalaimo kami, i nTobalu.
Ndisawinakamo baku setu, njo'u nu gogoso nu kalopa, nu waje, onde-onde.

Roo nasawinaka:

Da nta mesawimo kita ri duanga e a'i, mpapaku i mPangipi.

Pura mesawi tau napeboo ngoyu:

Pewuimo bara-bara, papute tompo utara.
Polonco ri mata ngoyu, duanga Lapi Tambaga, ja noti ulu nasanya.
Da ngkumoturu sakodi aku se'i, nu anaku pura-pura.
Ne'e mengaya ndaseko, ne'e jukusi ndato'o ri dulungi nu anaku Kasupua.
Kita ri popali bangke kama'ita, nu anaku pura-pura.
Metompa da kungkeyore yaku se'i, nu anaku pura-pura.

Nadonge i nCandopo Dada, bare'e nale'o i ngKapita Malela i Wali mPangipi pai duanganya. Malose rayanya nato'o: A, peole yaku se'i, ane yakumo kunjo'u da tumpunya yaku naini, kuepepe; Taunaka duanga

togoatu, ana mayunu! Molantomo duanga, mekatudu tau mesawi, mosumombamo. Ja pusa onombuya, nakita duanga, nato'omo, wo'u i Kasupua:

Ara nu njamo wo'u nakita duangani ri dulungi i ngKakaku?

Ne'e mengaya ndaseko ri dulungi, nu a'iku Kasupua.

Ne'e mengaya nato'o ri dulungi tua'iku, pantondanya Kasupua.

Jamo kakuasa mPue kita se'i, nu a'iku pura-pura.

Bare'e masae nakitamo duanga.

Ndilikemosa ndilikemo ntemaliga i Papa yore tulau, ngkakaku.

Pembangumo ntemaliga komi se'i, nu papaku i mPangipi.

Peole pesa sima'i, maeta sambira yangi, e papaku.

Se'i papa da mate da maropu kita se'i, e papaku.

Ne'e mengaya ndato'o nu anaku, Kasupua ri dulungi.

Soka bangke ri koronya setu njau, e anaku pura-pura.

Pewuimo bara-bara, papute tompo utara.

Polonco ntotoaka njoi ria, duanga Lapi Tambaga, au makoje mabaraka.

Masae-sae momberatamo pai duanga mpagora:

Ponyombamo ntemaliga, komi setu nu anaku i mPangipi.

Kapali kaea mata da nyomba, nu tuama u makoje katuwunya.

Peokomo ri dulungi, pekutana nu salata, e anaku Kasupua.

Nunja nca sala mami komi setu, nu pagora, nu iwali?

To'o ngkabongo nu tuama mombegora, momberata ri jaya.

Mowotumo i Kasupua:

Merapi ngkujaitimo duangata, e papaku i mPangipi.

Tende-tendemo njo'umo balangota ri dulungi, nu pagora e anaku.

Ma'imo lau ri soriku, siko se'e nu anaku Kasupua.

Ngkupalua ngkupalimbaka baraka nu anaku ri rayaku.

Yalimo nu parewamu gana-gana njai peti setu njau, ana.

Sikomo dampobalika i Sandopo Dada setu, e anaku.

Napasuamo puruka, baju, siga, parewa ntuama pura-pura.

I semamo da riunya da mewunu, anuku i mPangipi.

I komi damo riunya da mewunu, e pagora, e iwali.

Jaga ntunjo'umo nu woto ngkayuku tumba nu yu'aku.

Tandapaka, runcupaka lai bambaraku setu nu pangkita.

Jaga-jaga tunjo'uino nu yu'a ngo'a ngketagara.

Tandapakamo loma'i nu pangkita pewalinya i mPangipi.

Ja roo nawunu, mombetoto waremo i Sandopo Dada, bare'e ndeki raoa poyokonya, waremo ri kataba.

Ponyombamo ntemaliga komi setu i mPangipi.

Mawuti nca raya nganga, da napopanyomba yaku tau makoje.

Ndawangani panaguntu, tarakolo, panta se'i anaku.

Liolio wo'o ngguli, nu gandara, nu gajonya, nu bubuka, panaguntu pura-pura.

Pura marapa, napeboo ngoyu nato'o:

Pewuimo bara-bara, papute tompo utara.

Poloncomo ri mata ngoyu duanga Lapi Tambaga, makoje, mabaraka.

Moloncomo duanga, njo'u ri iwali.

Gajo gajo, remba-remba wai ma'i, nu pagora nu iwali.

Polonco mpewalili, se'i nu iwali nu duanga Lapi Tambaga.

Polonco mpewalili duangaku mabaraka.

Polonco mpesawikimo nu duanga nu pagora pura-pura.

Molonco, napesawi duanga mpagora napakalesa pura-pura duanga mpagora, matemo pagora.

Polonco njoi wiwinya duangaku mabaraka u makoje.

Nakarata ri wiwinya ri sompoa i nCandopo Dada se'i.

Moloncomo duanga, mosompo, mena'u tau ri sompoa.

Da ntamandake sangkani kita se'i, nu anaku pura-pura.

Mandakemo, jela ri lipu, liu-liu mesuwu sindekumo.

Bara ntongonya re'epa anu maea matanya taliwanua sindeku.

Liu liu mesuwu ndati sambali bente nji ue mpandiu, mandiumo, be napakoro me'onto ri lipu.

Bara ntongonya re'epa ami maea inatanya, ndipena'u ntapolega.

Pura mosore, njo'umo ri tasi, bare'e ndate tau mosompo mombetoto. Napeboo duanganya, mesawi, napeboo ngoyu, molonco duanga.

Paunda pompanea ri dulungi, uciri ngana pura-pura.

Maoromo nu korapoku yaku se'i, uciri ngana pura-pura.

Moapu, manana, mangkoni, mamongo, roo setu metompa yore i Wali-mPangipi.

Da ngkumoturu sakodi aku se'i nu anaku pura-pura.

Pitumbuya da ku yore yaku se'i anaku pura-pura.

Roo metompa yoremo koju, se'i duanganya molonco. Nadongemo i Molemba Kayoro togouncu tau meyawa-yawa i Wali mPangipi, be nale'o. A, nato'o: ane yaku meyawa, du kule'o, lawi yakumo se'i tumpunya. Ta'unaka duanga patatu, anamayunu. Natu'unaka koju, molonco duanga; mempone tau mosumomba. Ruampuyumbengipa da ganamo pitumbuya kayore i Wali mPangipi, nakitamo i ngKasupua, nato'oka i Uyumbua.

Se'ipa pai sondu tau sima'i, nu ngkakaku Uyumbua.

Ne'eja ndato'o, ne'e jukusi ndaseko, nu a'iku. Maeka koju mpodago rayaku yaku se'i, ngkakaku.

Dangga pelo, eka nganga, be da koje ntesakodi a'iku siko setu.

Pombukotu popoluka, poengkeka, popangkaka potundaka mombewunu ri dulungi yau a'iku.

Pembangumo ntemaliga, komi se'i nu papaku i mPangipi.

Se'i ma'imo sima'i wo'u sauncu nu iwali, e mPapaku.

Be masae momberatamo pai gora duanga i Wali mPangipi.

Ponyombamo ntemaliga komi setu, anaku i Pangipi.

Kapali kaea mata da monyomba nu tuama u makoje.

Pekutanamo salata kita se'i, nu anaku Kasupua.

Nu nja nca salamami, kami se'i nu pagora nu iwali?

To'o ngkabongo tuama mombegora, momberatamo ri jaya.

Pepasua nu bajumu, purukumu, nu kumumu, nu sigamu.

Sikomo da mompobalika i Lemba Kayoro setu, anaku pantondanya.

Pura napesua salananya, mosende ri wawo ngkataba.

I sema da mewunu riunya, anaku i mPangipi? I komi damo riunya da mewunu, e pagora e iwali.

Jaga-jaga tunjo'umo nu woto ngkayuku tumba nu yu'aku.

Tandapaka, runcupaka lai bambaraku setu nu pangkita.

Jaga-jaga tunjo'umo yu'a ngo'a ketagara.

Lapasaka nu loma'i nu pangkita nu anaku.

Telapa tawala, penaimo; meore ri raa malengi, metudumaka lai kataba, mombobolo-bolosi; pinca manawu riraa, kono penai i mPantondanya, matemo i Lemba Kayoro.

Ponyombamo ntemaliga komi setu, i mPangipi.

Mewuti nca raya nganga, da napanyomba yaku tau makoje.

Ndawangani panaguntu, tarakolo, panta se'i anaku.

Lio-lio wo'o ngguli nu gandara, nu gajonya nu bubuka panaguntu pura-pura.

Pura marapa, napeboo ngoyu:

Polonco mpewalili, duanga Lapi Tambaga ja noti ulu nasanya.

Polonco mpesawikimo duangani nu mpegora setu njo'u pura-pura.

Molonco duanga, anu mpagora nalesaki pura-pura, mate wo'u taunya pura-pura. Jelamo ri sompoa i Lemba Kayoro, mandake tau ri lipu naseko, be makaliwongo, liu njoie mpandiu, mewalili, liu-liu tudu lai tasi, mesawi, napeboo ngoyu mewui, molonco duanga. Napokau ananya moapu, mananamo mangkoni, mamongo yore, pitumbuya najanji. Nadongemo i Mobaju Rante bambari i Wali mPangipi. A, nato'o, tuma'i i Wali mPangipi tau aopo manggora, be nale'o, ane yaku, kule'o. Lo'u, nata'unaka duanga limatu, molantomo, mekatudu mesawi njo'u ri koro ntasi. Sampuyumbengipa nepa da menaa i Wali mPangipi, nakitamo duanganya i ngKasupua.

Se'ipa da mate kita se'i kakaku i Uyumbua.

Ne'e mengaya ndato'o, tua'iku i Kasupua.

Pembangumo ntemaliga, nu papaku i mPangipi.

Se'ipa da mate kita se'i, i mPapaku i mPangipi.

Ne'e mengaya ndato'o, nu anaku i Kasupua ri dulungi.

Ne'e mengaya ndato'o ri dulungi, nu anaku i Kasupua.

Sima'i pagora, mosumo.

Polonco ntotoakamo njoie ria, duanga Lapi Tambaga.

Momberatamo ri koro ntasi.

Ponyombamo ntemaliga, komi se'i tokede i Wali mPangipi.

Bare'e nca da monyomba nu tuama u makoje katuwunya.

Pekutana nu salata ri dulungi, e anaku i Kasupua.

Nu nja nca sala mami kami se'i, nu pagora nu iwali?

To'o ngkabongo nu tuama mombegora momberatamo ri jaya.

Pesuamo parewamu gana-gana, e anaku Pantondanya.

Sikomo da mpobalika i Mobaju Rante setu, e anaku.

Peponemo ri kataba setu ndate, e anaku Pantondanya.

I semamo da mewunu, da riunya, e kedeku i mPangipi?

I komimo da riunya da mewunu, nu pagora nu iwali.

Jaga-jaga tunjo'u nu woto ngkayuku tumba nu yu'aku.

Tandapaka runcupaka lai bambaraku setu nu pangkita.

Jaga-jaga tunjo'umo yu'a ngo'a ngketagara.

Lapasaka nu loma'i nu pangkita nu anaku.

Nawunu i Mobaju Rante, pura tawala mombetoto, be masae mate i Mobaju Rante; nato'o yununya:

Ponyombamo ntemaliga komi setu, kedeku i Wali mPangipi.

Bare'e nca monyomba u makoje u tuama borosapu.

Polonce mpesawi tima duanga nu pagora setu njo'u pura-pura.

Naposoki nduanga Lapi Tambaga duanga nggora pura-pura. Puramo mate tau napeboo ngoyu napapolonco duanga lai tana. Jelamo ri posompo, mena'u tau mandake ri lipu, moliu, njo'u ri ue mewalili mandiu, mesawi ri duanga, njo'u wo'u mangkoni yore pitumbuya. Nadonge i Molemba-Labu tuma'i i Wali mPangipi, moduanga wuyawa. A, nato'o, mau be nakoto ntau limauncu, kukoto ja, peole ane yaku se'i meyawati, kule'o. Onoatu duanga nataunaka pura molanto mesawi.

Masae-sae mombemosu, pusa onombuyamo, sambuyapa da menaa i Wali mPangipi, nakita nu ananya tuma'i wo'u gora.

Pewuimo bara-bara, papute tompo utara.

Polonco ntotoakamo njoi ria, duanga Lapi Tambaga.

Momberata koju, mombemosu.

Ponyombamo ntemaliga, komi se'i, to kede i Wali mPangipi.

Bare'e nca da monyomba nu tuama u makoje katuwunya.

Nalapasakamo panaguntu gora, bare'e re'e tau mate.

Pasuamo parewamu purukamu, nu bajumu, nu sigamu gana-gana.

Siko da sampotadanya i Molemba Labu, anaku i Uyumbua.

Meokomo i Uyumbua, mombetoto, be masae mate i Molemba Labu. Napesawi nduanganya duanga nu gora, puramo maropu. Rowi pura, matai ri tana njo'u ri sompoa, bare'e re'e tau napowotuka ja manoto polayaginya. Nadongemo i Molemba Apu pura opi tau aono, nato'o: Mau ewance'e, yaku da lo'u sangaya-ngaya da kule'o. Nata'unaka duanga pitumbenci, napesawi mosumomba gora, bare'e masae momberata. Pomberatanya se'i napopanyomba, bare'e re'e tuama moyiyomba. Napeboo ananya i Uyumbua, napombetoto.

E siko da mpobalika i Molemba Apu seta, e anaku Uyumbua.

Morengko, mesuwu ri wawo ngkataba, mombewunu, mombetoto, mombemosu, wara rengko i Uyumbua pura-pura, kono apu i Molemba Apu. Nato'oka papanya: A, nato'o, be ndakoto. Mesono i Wali mPangipi: Pombetotoka, be ndakoto tuama, maea mata! Mombetoto, ruangkani pomberatanya, nawela i Uyumbua, jamo sakodi mangkekeni

pela ngkomponya napomai i Molemba Apu, bare'e wo'u ware. Mekakore i Kasupua, nato'o:

Yaku da sampobalinya i Molemba Apu setu, e papaku.

Pasuamo nu bajumu, purukamu, nu sigamu, parewamu gana-gana.

Roo napesua, mempone ri kataba, pemponenya sangiri apu, be kono mekoni i Kasupua; mesombulaka be nale'o nu apu. Mepomai i Kasupua, kono i Molemba Apu, be tinja napomai. Nakeni ngkasaenya, tinjamo napomai matemo i Molemba Apu, matemo apu lembanya, tau pura pura napepate nduanga Lapi Tambaga.

Njo'umo ri sompoa, ndeku mandiu sarai ja, mewalili wai njo'u, mosumombamo wo'u. Ungka ire'i bemo nayawataka, bemo yore i Wali mPangipi, menaa-naamo. Ja togombuya polonco nduanga, nakitamo bamba ue mpapanya pai nenenya.

Nibangani panaguntu saretu pura-pura, e anaku.

Nitunjumo panaguntu, ne'emo ndiowe-owe, e anaku.

Natunju koju, rantani mosu ri banua nenenya, nadongemo nenenya pai papanya, napokau ana mayunu:

I mbe'imo i Sungko nTada, nTada Sungko, da malai loi tasi.

Ndiako lo'u ndiu, ndiole tau lai tasi setu, Sungko nTada.

Bara nu tau maja'a, bara nu tau madago, da nakanoto ndayata.

Lo'umo i Sungko nTada pai i Tada Sungko, be polasi, maeka rayanya mewali mompetumbuka: O, sondo tau, kapude! A, da loyu wo'u anu bangke, ne'e anu kodi, be monco. Mewalili wo'u be polasi: O, sondo koju tau, Pue, be ndakoto da mosu.

Napokaumo anu bangke mpodago, bare'e rantaninya jela. Njo'umo langkai tu'a radua, jela lai tasi motunda, njauka tau ri koronya, bepa mena'u. Ya, owemo riu mopanaguntu, da kupeoasi. Naowemo koju, napeoasi:

Maka komi setu ungka nu nja ndikama'ika ma'i tasi?

Napokau i ngkapue ma'i mompeole komi e, anu rata ri se'i.

Jingki raya nu mokole mangandonge panaguntu sondo gaga.

Bare'e da ndiposusa kami se'i, e ngkaiku.

I kami owi malai ntonya kodi, malai pai kobati.

Ndiako mpewalilimo ndito'oka nene da metudu ma'i ri tasi.

Da natomulaka kami ri tasi ndito'oka nu neneku.

Mandakemo muni langkai tu'a, nato'o: Ewa mbe'i, ngkai, kalo'umi? A, nato'o, baree wo'u ndapomasusa silau, anami mewalili. Mosompomo nenenya: O de de, anaku, jelamo! Mosompo tau salipu njo'u mompago tau nepa kajelanya. Tudu lai tasi, mena'u i Wali mPangipi pai ananya pura-pura, momberata pai nenenya, nato'o: Ndipandake wo'u komi, ana mayunu da ndiso'o baula aono, da ndado'asalamaka anaku. Naso'omo baula nano'omo lai tasi, wea nakeni, moapu tau salumbu. Pitungkani nabasado'a sandeme, pitu eo wo'u podo'asalamanya. Puramo pitueo:

Pogombo ndipogombomo ntemaliga-liga, e papaku i nTa Datu.

Pogombo ntemaliga, koini se'i, nu Magau, nu mokole pura-pura.

Nu nja nca da ndagombo, da ndato'o, e anaku i mPangipi?

Da mogombo da moore duangaku, e papaku i nTa Datu.

Da ndiore duangaku ndeki lore, e papaku i nTa Datu.

Nepa mosusa da ndaore setu. Natowosi kaju nakadago ndaore duanga; pura natowo nawunusi randanya, nakeni ri tana napetingkeni tau ri lau. Metingkeni tau papitu lipu, bare'e lau tekolika, be napojo.

Bare'e da napakono da melinja duangaku setu njau.
Papitu timbuku susu kulalagi nduangaku, e Papaku.

Napilisimo gana papitu, napapoturumo, nando be napokono ana watua yau. Sangadi ana ngkabosenyamo se'i nepa napokono. Napilisi wo'u ana mokole napokulalagi, marengko mpodago, naposompu, roo setu moturu ri wawo mbone ri pontu nduanga.

Pewuimo bara bara, papute tompo utara.
Polonco ntemaliga, duanga Lapi Tambaga, ja noti ulu nasanya,

Mewui ngoyu, molengko-lengko duanga, nalapasaku molonco, polonconya se'i toto liu ndati lipu. Napepali papa pai nene anu napokulalagi waka ananya be nakita; nakae kae bone, bemo lau. Mesono i Wali mPangipi: Mandakemo kita komi nene pai papa anu roo da riunya. Mandakemo pura mesua ri boboka, nakitamo ana we'a papitu setu, ndati pogulingi nduanga mongkao-ngkaosi, be mate. Jelamo ndati banua, maroo-roomo.

Masea-sae karoo-roonya: A, nato'o: ewa mbe'imo komi, nene pai papa, be majingki rayami mongkita yaku? Makuja pai nupomasusa? A, mekisuna, yaku, da ndapekisuna. Nata'unaka Indo i Datu pae, napombaju ana mayunu, mombaju sambengi-sambengi, saeo-saeo, gana wea. Malaimo anu melulu baula, anu meira mbiu, anu meira ngkayuku ndapokalopa, anu mewoyo: roomo se'i, jelamo pura-pura nepa nato'o: Naipua du nariu nu labe. Rua mbengi nakeni ri ue, nariu nu labe, roo mandiu ngkinowia, mosore nakeni ndati banua,

mangkoni, naringko ganda, mokolontigi. Bangke reme mompasuna, nakenika labe dula pai kalopa, be masae gana togombengi, mena'u lai tana, naimbaka malai ri ue, naposoki ngkayuku, napakuli kejenya, mareme wo'u natimamo binangkari, samba'a tau samba'a binangkari, patampuyu pai samba'a, maka ananya pura-pura nasuna. Byamo i Wali mPangipi ndati untunya mpodago-dago. Roo mandiu mosore, metutu mompakuli kejenya, tudumo tupe ntau ri suara i Wali mPangipi. A, nato'o: i sema motupe, sakodi kono yaku. Meeli nakita i To Karo Uja ri tuwa ngkayuku da ma'i manga'e meungkusi lipu i Wali mPangipi, tau ndati wawo yangi kare'anya, ja nauyu i nDatu ri kawadi bangke, ewa woto ngkaili. Lima tamungku tau njo'u ri togongi ri limbo, yunu i nTo Karo Uja. Mewalili ndeki banua, mewalili wo'u i Wali mPangipi pai ananya.

Pogombo ndipogombo ntemaliga, i mpapaku i Ta Datu.

Nu nja ndapogombo nca ndato'o, e anaku i mPangipi?

Da mogombo da mobente pitu ntapi sungku sungku ndeki yangi.

Ole mosumo iwali kita se'i, nu papaku i Ta Datu.

Ne'e ntani lintu yore komi se'i, nu papaku i nTa Datu.

Ne'e ntani lintu yore komi se'i, tau sondo pura-pura.

Bare'e ndaole-ole nu silaka da merata, e papaku.

Bangke reme malai montotosi kaja, mobentemo, pituntapi bentenya, saeo ja napowia. Ja gana logo mbengi, mototoro'o manu, membangu i Wali mPangipi, nalike tau nato'o:

Pembangu ndipembangumo pura-pura lai pu'u bente, siri ngana.

Mototowo manu mesuwu tau mewoo-woo tau sambali bente mopanaguntu.

Posompo ndiposompomo, nciri ngana mombewunu mombetoto.
Pombewunu ne'e dangga, nciri ngana pura-pura.

Mombewunu mombetoto, re'emo au mate sa'e yunu i Wali mPangipi, sa'e tau ma'i meungkusi.

Pembangumo ntemaliga, nu anaku pura-pura. Da ntamalai ri ue kita se'i, nu anaku pura-pura.

Mesombulaka ri raoa ungka lai raya lipu nji ue katudunya, tau patampuyu pai saba'am. Mandiu, mompakulisi, mewalili narata jamo sampuyu yununya ri lipu, pura mate.

Ndipasua parewami gana gana purukami, e anaku.
Ndipesambali komi se'i, nu anaku, natomunaka nu iwali setu ma'i, pura mate papami.

Maka papa nu ana i Wali mPangipi pura-pura napepate i nTo Karo Uja. Mesambalimo i Uyumbua, i Kasupua, pantondanya pura-pura. Nalapasaka ananya mombetoto i Wali-mPangipi be napokono, si'a malai mompago kawadi panyu tau ma'i meungku. Jela njai ria nasayu najujulaka, nauyu uyu, maja'amo penainya nawunca penainya, depa nano'osaka kawadi manawu ri tana pura-pura. Mewalili ri lipu naratamo i To Kara Uja ngkalionya, yununya mate pura-pura. Ne'emo ndapepate i To Karo-Uja da ndawai malai mompetumbuka rongonya. Malaimo i To Karo Uja bare'emo nakoto mewalili, bara rimbe'imo kapayanya bara ri ra yopo, bara natungku nduata, be taincani. Romoo maungku, maroo-roomo, napatuwu tau mate

pura-pura, iwali roo natawani, jamo si'a mompatuwu. Masae-sae karoo-roonya:

Pogombo ndipogombo komi se'i, nu papaku i nTa Datu.
Pogombo ntemaliga komi se'i, papaku pai neneku Indo i nDatu.
Da mogombo da mombaju baku mami da malai ri rongoku.

Nata'unaka pae, mogombo tau salipu nawuncamo ri karu, nasawi nakamo ri duanga ri wawo ntana.

Naipua da desuwu kita se'i, nu anaku pura-pura.

Gana rua mbengi mesawi ri duanga.

Ndioremo somba setu, nu anaku Kasupua.
Ndita'amo guli setu, nu anaku Uyumbua.

Naoremo somba, nata'a guli.

Buleremo somba setu ri dulungi, nu anaku Kasupua.
Pewuimo bara-bara, papute tompo utara.

Mewui ngoyu, bare'e nakita ntau poliunya lai tana, sampali nakitasaka njoi koro ntasi, mosumombamo.

Polonco ntemaliga siko se'i duanga Lapi Tambaga.
Nakarata ri lipunya i nTobalu i Kapita Boneaka.

Moloncomo koju, jamo sambuya polonconya, jelamo ri somponya.

Poiwo pompakoraka da ntamandakemo kita pura-pura, e anaku.

Mompakoroka mandake, mempone sawi ri banua, motunda ri wombo.

Mbe'imo tali wanua, da mompamongoka kami re'i, e rongoku i nTobalu.

Napamongoka, ya roo mamongo moapu manana, nairu mangkoni.

Pesuamo tale ali, siko se'e, nu rongoku i nTobalu.

Yaku yurumo matakua da yoremo, nu rongoku i nTobalu.

Nasuari natale ali, yoremo i Wali-mPangipi. Bangke reme membangu, mesono i Tobalu:

Mbe'imo tau tu'a njo'i ra lipu se'i, ndikasingkandomu ma'i.

Singkandomumo koju tau.

Pedongeka da ngkuto'o, komi se'i tau tu'aku pura-pura.

Da mogombo da mombaju komi se'i, tau tu'a pura-pura.

Mogombomo tau tu'a; monuntumo Tobalu i Kapita Boneaka. Nu anu nato'o, knpekigombo komi se'i anu re'e da mongkare'eka manu, manu yau, anu mongkare'e mbula, mbula da yau, da ndasoko, ndakeni, ndaponika.

Mesonomo wa'a ntau tu'a: Ane setumo, Pue, io, bare'e wo'u ndasapu nca. Njo'umo moapu ngkinowia, singkandomu, naore ri banua, nawawa ri rongonya nawali wawa, ja roo nanika, mawengi yoremo. Bangke reme menaa-naa maroo-roo, bare'emo re'e bara nja napowia-wia manotomo porongonya. Masae-sae karoo-roonya rantani gana togombuya santa'u, togonta'u. A nato'o, to'u nditima tukakami da ndato'oka da ma'i i Uyumbua pai pantondanya, da njo'u morongo pai Tobalu i ngKapita Malela, i Molemba Apu, i Molemba Kayoro, i Sandopo Dada, i Mobaju Rante, i Molemba Labu.

Malaimo koju i Kasupua napokau. Jela lai pantondanya, napeoasi:

Nunja ndikama'ika komi se'i, tua'iku Kasupua.

Kami se'i napokaumo mPapatu ma'i mangantima siko.

Mesonoma pantondanya:

Ane papata mompokau jo da ndeku kita se'i tua'iku.

Mesono rongonya, i nTobalu Molemba Apu:

A, yaku wo'u da ndeku, nu rongoku nu mokole.

Mesonomo rongonya:

Poiwomo pakoroka, nu rongoku i nTobalu.

Mesonomo i nTobalu:

Ndikasingkandomu ma'i, nciri ngana pura-pura.

Pedongeka da ngkuto'o gombo se'i, nciri ngana pura-pura.

I komi ana mayunu u tuama patampuyu da kukeni.

Anu we'a patampuyu da ngkukeni pura-pura. Raneo dekatudu kita se'i, nu rongoku i nTobalu.

Bangke reme mekatudumo koju, mesawi ri duanga Lapi Tambaga; pura mesawi, mosumomba, rata njo'i sompoa i Kapita Malela mandake; bare'e mandake pantondanya pai i nTobalu rongonya, jamo i Kasupua mandake. Napeoasi ntau ri lipu.

Nunja ndikama'ika komi se'i, tua'iku i Kasupua?

Kami se'i napokaumo mpapata ma'i mangantima siko.

Mesono i Uyumbua:

Bare'emo da ndasapu, nu papata mompokau, tua'iku Kasupua.

Yaku wo'u da ndeku, nu rongoku i Uyumbua. Jamo siko montangara nu rongoku i nTobalu i ngKapita Malela.

Ndikasingkandomu ma'i, nciri ngana pura pura.

Pedongeka da ngkuto'o gombo se'i, nciri ngana pura-pura.

I komi ana mayunu u tuama patampuyu da ngkukeni pura-pura.

Anu we'a patampuyu da ngkukeni pura-pura. Raneo dekatudu kita se'i, nu rongoku i nTobalu.

Bangke reme tudu lai tasi, mesawi ri duanga, napeboo ngoyu, mosumomba.

Pewuimo bara-bara, papute tompo utara.

Ja sambengi posumombanya, mewalilimo ri sompoa i nTobalu i ngKapita Boneaka. Mandake pura-pura, meoasimo papanya.

Ratamo ntano komi, anaku pura-pura.

Io ratamo kojo kami pura-pura, nu papaku i mPangipi.

Maroo-roomo wo'u, bara sampuyu mbengi karoo-roonya ungka ri kajela nu ananya. Mesono i Wali mPangipi:

Metompa mompalacanamo kami se'i, nu rongoku i nTobalu.

Yaku mawomo rayaku ri neneku, ri papaku.

Ane da lo'u komi, yaku wo'u da melulu, nu rongoku i mPangipi.

Bare'e nca da ngkutagi siko se'e da melulu, nu rongoku i nTobalu.

Napalele wo'u taunya, nato'o:

Ndisingkandomu ma'i, nciri ngana pura-pura.

Pedongeka da ngkuto'o gombo se'i, nciri ngana pura-pura.

Singkandomu pura-pura ivea, tuama anu tua, anu mangura.

I komi da kupoyunu, siri ngana nu tuama patampuyu.

We'a wo'u da ngkukeni patampuyu, nciri ngana pura-pura.

Naipua dekatudu kita se'i, nu rongoku i nTobalu.

Ja gana mbengi, puramo napowia baku, mekatudumo kojo ri tasi, sawi ri duanga Lapi Tambaga pura-puramo mesawi ananya, be napojo i ngKasupua: Mesono i Wali mPangipi:

Nunja napojangai siko se'i, nu anaku i Kasupua.

Pesawi ntapesawimo mpakaliga, siko se'i nu anaku Kasupua.

Ndiposumombamo komi nu papaku, ngkakaku Uyumbua.

Bara ja da marau siko se'i, anaku i ngKasupua.

Bare'e yaku marau, neneku i nTobalu, papaku i mPangipi.

Ne'e ndato'o yaku marau, da kupebutuka mojaya ri raa, komi ja mosumomba da kupaincani bara lawa jaya ri raa, bara mosu yau. Mosumombamo kojo Papanya, nakita ewa ogu ngkayuku kabangke nduanganya, depa mesombulaka si'a; pesombulakanya se'i, jamo kandeku ndeku kalo'unya, ja tepatunda kandekunya liu-liu ri ngoyu, mawaro uase karimbonya napombetopoka nu ngoyu, mesombulaka ri ndeku, be ndeku, menawusaka be lo'u, merompotaka ri usunya, be njo'u. Jamo maroo-roo ri raa. Mosompomo i Wali mPangipi napeoasi bara jelamo ananya i Kasupua, nato'o ntau: Bare'epa. A, nato'o, matemo ntano anaku i Kasupua, masusa kojo

rayaku. Nalapasaka mompepali ndeku ri untu ue, bare'e, mewalili wai lo'u be narata, mandake ri banua nu manianya, montima manianya pai ananya pura-pnra. Wa'a nja'inya. Gana sambuya, ruambuya, togombuya, bare'e mangkoni manginu, gana patambuya, bemo nakoto, gana pitumbuya bemo molengko, jamo ri nganga ncuile kare'e nu inosanya. Sawimo eo, yore papanya, nepa rata angga ngkainya nato'o: E, Wali mPangipi, siko ja yore; bare'e nuepe anamu sindate ri raa, napombetopoka nu ngoyu, da mate naini. Mena matanya nato'o: A, ndate ntano ri raa tua'imu, e Uyumbua! Mosompomo i Uyumbua pai pantondanya, tudu lai tana, mesombulaka ndeki raa, sampesombulaka nano'o ri witinya i Kasupua, lo'umo, tudu ri ra lipu napoaju depa nawangkeka ue ri nganganya, napebonceka, be masae lo'umo pai upenya, be masae molengkomo, magasimo. Maroo-roomo ganamo sambuya karoo-roonya:

Pogombo ndipogombo, nu papaku i nTa Datu.

Da mogombo, da mobente kita se'i, papaku i nTa Datu.

Bare'emo da masae da ratamo nu iwali i Kombengi.

Nalapasakamo mobente, pituntapi, puramo njo'u moruaua mombepate ri koro ntasi pai ne'emo ma'i lipu, sondo we'a, ndatomunaka i Kombengi meposi inosa ntau. Mkatudumo lai wiwi ntasi, sawi ri duanga, naore sombaa, nata'a guli, njo'u ri duanga Lapi Tambaga, nabulere somba, napeboo ngoyu mewui, molonco duanga. Masae-sae sakodi sima'imo i Kombengi, bara ewamo ma'i Golontalo kalawanya. Mosumombu sisi'a, bara ewa ri Tojo, matemo i Uyumbua, konomo naposi inosanya ja ewa pontumo Podi, pantondanya, ewa ri Kayu Nyole, matemo i Kasupua, ewa ri Bongka matemo ananya pura-pura ewa ri Buntamo i Kombengi, ja kangkalionya i Wali mPangipi

jela ewa ri Nguju Apu, momberatamo pai i Kombengi i Wali mPangipi.

Ponyomba ntemaliga, siko se'i i mPangipi.

Kapali kaea mata da monyomba nu tuama au makoje.

A, makoje ntano siko, Wali mPangipi? Io, makoje. Naposi inosa i Wali mPangipi, bare'e lo'u inosanya. A, siko ntano borosapu. Io borosapu. Makoje mpodago ntano siko. Io makoje mpodago. Papitu ntano Kombengi meposi-posi inosa i mPangipi, bare'e njo'u.

Polonco mpesawi timamo duangani nu pagora pura-pura setu njau.

Nalapasaka duangani Lapi Tambaga, mompesawi duanga ntau setu, pura mate tau, nageromo duanganya. Jamo duanga kare'e i Kombengi bare'e naposo nce'e.

Polonco njo'i wiwinya duanga Lapi Tambaga, ja noti ulu nasanya.

Molonco duanga ri wiwi ntasi.

Gajo gajo, remba remba wai ma'i siko se'i, i Kombengi.

Nalulu, jela ri sompoa i Wali mPangipi, morempo-rempo ri ra nduauga yununya mate pura-pura. Mosompomo i Kombengi pai i Wali mPangipi napombetotoka lai tana. Mombeloto ungka ri kawuronya, laukamo eo, depa pura mate Kombengi papitu setu, pura-pura napepate i Wali mPangipi, ntano papanya, nenanya, tau pura-pura napepate inosanya anu mekoyo-koyo, jamo pekakorenya laupa baso ri talikunya, anu monombu, lai uepa, tonya mobonggo-bonggo mongkekeni woyo; anu mancari, ri ejapa pai bemo njau inosanya. Re'e anu mowia pai rongonya tonya mombesokowaka mate pai ewase'inya. Mandake i Wali mPangipi, naratamo tau mate, juku-juku, mempone ri banua, ja bukemo tau mate, narata rongonya

matemo. Depa natima wuyua mdongonya, nawebusi ue amu mate, tuwu muni pura-pura. Napepali anu mate ri yopo ri duanga, ri buyu, ri yombo pura-pura napatuwu. Ja pura tuwu, maroo-roomo, matemo i Kombengi papitu.

Ganamo pitumbengi, moncongka wo'u, i Wali mPangipi:

Da nta malaimo kita nu anaku i Uyumbua, Pantondanya, Kasupua.

Kami da ngkamalai, e papaku i nTa Datu.

Rimbe'i da ngkanjo'umi komi se'i, nu anaku i mPangipi?

Da lo'u da ngkamangaewa i Pue Ala ta'ala, e papaku.

Bare'e nca da nukoto da maewa i Pue Ala ta'ala.

Da ngkupesoba maewa i Pue Ala ta'ala, e papaku.

Bara yaku da nanangi nakanoto kuincani, e Papaku.

Jamo tatogo ananya napoyunu, ka'aoponya si'a. Lo'umo ja jela ri wayau manawusakamo. Kanawusakanya se'i, rampemo ri angga mbayau, pojaga-jaga, nadika i mPue Ala ta'ala paikanya kodi kodi nca wayau ri tana.

Tulo'u da ngkapoliu, ngkai angga mbayau.

Bare'e nca da kuwai da moliu komi se'i, ngkumpuku i mPangipi.

Tulo'u da ngkapoliu ngkaiku angga mbayau, Bare'e nca da kuwai moliu komi se'i, makumpuku.

Bare'e masae maja'a rayanya, napomaimo angga setu, tudu mate, moliumo sisi'a. Ja rata lai pu'u eja banua mPue Ala ta'ala motunda ri balampa.

Posompomo ntemaliga, komi se'i, Pue Ala ta'ala.

Bare'e nca da nu koto da maewa yaku se'i, e anaku i mPangipi.

Posompomo yau ma'i da ndapebutuka, e Pue Ala ta'ala.

A, bare'e da nukoto, kede, paikanya ane da rayamu da mobaraka da makoje mpodago, ma'i da nukupantdoka siko. Bare'e napokono i Wali mPangipi, jamo napekisompo, nato'o: Posompo, posompo! A, bare'e da kuewa siko, mau nupokona, be da ndakoto. Bare'e masae nanangi mPue Ala, mempone meguru. Pegurunya se'i bara ewa mbe'i bare'emo taincani basado'anya. Mewalilimo ri banunyu lo'emo mpodago, maroo-roomo. Lairiamo kapusanya.